

MATALÉNE

Quanne ca fuje accise cu doje bbotte
nu capaddozeje, a u timbe d'u frangése,
te stéve pe succéde u quarandotte,
nu macèlle p'u povere pajese.
Nu cèrte Sciampiufèle, nu generale
ch'ère nu bbèlle poche ndessecuse,
nen z'ère misse ngape,
p'arreparà lu male,
de destrugge Lucére sana sane?
E quanda messaggire nen se sape,
pe tutt'a settemane,
jirene nmande e rréte
pe scungiurarle e pe cercarle scuse.
Ma ninde! Quille tuste come 'a préte!
Fin'a quanne 'na cèrta Mataléne
ch'ère 'na segnurazza
bbèlle cume a nu sole
sscennije da lu palazze,
asscije ammizz'a chiazze
e decije: «Fenime st'altaléne.
Si me facite, gende mije, l'onore,
vach'ije a parlarce a quistu mije signore.
Nd'a rēcchje ci dich'ije quatte parole.
Succéde tanda vote
ca 'a fèmmene de l'ome cchjù ce pote».
Ccussì che tutt'i sande saggèrdote
da cchjisa cattedrale,
c'u siniche e c'a ggiunda comunale
- 'a bbanne annande e apprissime u cunfalone,
nu cuscine chi chiave d'a cettà
pe ddarle a quillu llà –
ngurtèje, a Porta Troje s'abbijaje
ed arrevaje fine a i Perazzèlle:
Quanne doppe che quille s'engundraje,
che na resate e che 'na parulèlle:
«Nè, Sciampiunè, nze ccose ca se fanne!
vuje fà propreje u nfamone?
U tenarrisse tu quistu curagge
de fà tanda malanne?».
Si a fèmmene se mette, nen ze scappe:
tande decije, tante facije, e salvaje
quistu pajese nustre da u dammagge.
I fèmmene a Lucére nen so' guappe?